

vnd vnfruchtper ist. yedoch haben ettliche dise gegent mit wunderperlichem preise vnd lob erhebt. vnd der got der behawfung gehaissen. In diser gegent ist ettwen die aller edelst stadt Athenis gewesen. die an preiß vñ rüm-
rengkeit keinen mangel het. Dieselb stadt hat zu disen vnsern zeiten ein gestalt eins kleinen vnachtpen stettleius
Doch auff dem felsē da der alt tempel. Minerue gewesen ist yezo ein schloß oder purg durch alles Kriechisch
land namhaftig von größe wegen ires gepewes vnd wolvewarnus vor sturm vnd gewalt. Dise stadt hat ein
Florentinischer man dem Türckischen kaiser eingeben. als er nach angerüeffter hilff der lateinischen von nymant
beystand finden molht. darumb warden ime ettliche döffer eingegeben darin vnadelliche zeit zefüeren.

Don Peloponeso

Peloponesus ligt an der Attischen gegent ettwen ein schloß ganzes Kriechischen lands. daß außershalb
des adels vñnd der mechtigkeit des volcks darin zaiget die gelegenheit der sätter vñnd gegent ein fürsten
thumb vnd herrschaft an. In diesem land sind vil tale vñnd berg. vom nydergang in den auffgang begreiff es
M. cccc. roßlawff. vñnd im vmbkreiß. iij^m. zway meer das Ionisch vñnd Egeisch geen vmb dises land. Als
Anthemidous spricht. In diser gegent ist die edel stadt Corinthus gewesen. Dis land wirdt herwt von den La-
teinischen Morea genant. darin ist Achaia Messania Laconia Argos vñnd Archadia schier in der mitte gelegen.
Somirates ist nach bestreitung Thessalonia Boecia vñnd Actica außershalb Athenas bis an die stadt Eramilii
gezogen vñnd hat die marwin derselben stadt zerrüdet vñnd ein ierliche zinsperkeit auß ergebung der Pelopone-
ser auff sie geschlagen. Als aber darnach die hungern auß bewegnus Juliani des cardinals wider die Türcken
zu der waffen griffen vñnd ettlich glücklich zeit wider sie eroberten do wardt der Kriechisch kaiser Constantin⁹
daselbst ertödt. Der Dispot diser prouinzen vnderstund sich den Türcken den tribut nit zegeben vñnd die stadt
Eramilium wider auffgerichten. Von derselben säch wegen wardt er darnach vmb ein grosse sun gelts ge-
strafft.

Achaia

Achaia die gegent hat (als Ptolome⁹ schreibt) vom nydergäg epirū. vñ mitternacht Macedonia vñ ein teyl
des Egeische meers gegē dē auffgäg desselbē meers sich endede bis hin an dz höchst gepirg. gegē mittē tag
adriatisch meer vñnd wo dz also war ist so begreiff achaia die lād vñ gegē actica. boecia. phadē. thessalia. mag-
nesia. etholia vñ acarnania. doch an einem andern ende setz Ptolomeus das die stett Epir Dura Helena vñnd
Pherecia in achaia seyen. Die gegent acarnania zwischen Epirum vñnd Boeciam ist der gegē Etholie vermische
das ist yezo ein herzogthumb. Johannes vintimilius auß Sicilia pütig hat sein tochter dem dispoten diser ge-
gē acarnania zu der ee vermehelt. Darnach als die Türcke die gegent acarnania bekümmerten vñnd den tochter
man belegeten do kame er mit einem kleinen geraisigen zewg vber meer vñnd verfolget die belegerer vñnd erlan-
get gegen den Türcken ein gedechtnus würdige ernd erlegung mit klainer anzal volcks ein grosse menig der tür-
ken flüchtig machende vñnd seinen tochterman erlösende. der doch darnach vnlang durch heimliche verrettereij
von den Türcken gefangen vñnd seiner herrschaft berawbt wardt.

Don Epiro der gegent

Epirus die gegent fahet sich an vom nydergang an dem acroceratinischen gepirg vñ erstreckt sich hin gegē
dem auffgang bis in das ambrachinisch tal tausent vñnd dreyhundert roßlawff. Gegen mitternacht an
Macedoniam vñnd gegen dem auffgang an achaiam stoffende bis hin an den fluß acheloum. Gegen dem nyder-
gang an das Ionisch meer raichende. In diser gegent schreibt Theopompus. xxij. völker gewesen sein. Die
geschichtschreiber setzen das dis ertreich am meer glücklich vñnd fruchtper vñnd ettwen darin vil vester stett vñ
schlößer gewesen seyen. aber von widerspenigkeit wegen des volcks gegen den Römern ist dise prouinz zerstō-
ret. Vñnd als Polibijs setz. lxx. epirotisch stett von Paulo emilio dem kaiser von grund auff vñndgekert worden
nach vberwindung der Macedonier vñnd des kōnigs Persarum. In diser Epirischer gegē ist der weytgedech-
tig actizisch streit beschehen. darinn der kaiser augustus marcum anthonium durch einen schiffstreit vñnd auch
Cleopatram die kōnigin Egipiti defimalis gegenwürtig bestritten vñnd vberwunden hat. darumb hat augustus
in dem ambrachinischen tal ein stadt Nicopolim das ist soull als vberwindung gepawt.